

Фүүкүокагийн энгийн жишээ

Огноо: 2016-10-11 20:46:15



Олон улсын сэтгүүлч Ц.САРАНТУЯА

НҮБ-ын Хүн амын нутагшил, суурьшлийн хөтөлбөрийн дагуу Япон улсын Фүүкүока хотод хөл тавих завшаан тохиов. Фүүкүокаг Японы 47 мужийн нэг Кюшүгийн хамгийн том хот гэдгээр нь эчнээ мэднэ. Тохилог, цэвэрхэн энэ хот сая 500 мянян оршин суугчийнхаа туслын тулд бүтээн байгуулагдаж, хөгжин дэвжиж иржээ. Орон сууцны хотхон, үйлчилгээний газар гээд аливаа барилга байгууламжийг барихдаа "Олон нийтийн зориулалттай зайд талбай"-г онцгой анхаардаг хуультай гэнэ. Бүр хотынх нь барилга байгууламжуудын нийт талбайн тэн хагас нь олон түмэндээ зориулагджээ. Ингэснээрээ Фүүкүока үзэсгэлэнт цэцэрлэгт хүрээлэн, усан оргилуур, амралт зугаалгын олон арван газартай амьдрахад таатай хот болжээ.

Фүүкүокагийнхан тайван амгалан, эрүүл орчинд аж төрж байна. Үүнийг эхэлж онцолдогийн учир нь Фүүкүокад болсон Азийн сэтгүүлчдийн XI бага хурал хотуудын тулгамдсан асуудлыг хөндөж тавьсантай холбоотой. НҮБ-ын Хүн амын нутагшил, суурьшлийн хөтөлбөрийнхэн ийм хурал жил бүр зохион байгуулдаг.

Фүүкүокагийн бага хуралд Вьетнам, Малайз, Солонгос, Тайланд, Хятад, Энэтхэг, Японы сэтгүүлчид оролцов. Сэтгүүлчид өөр өөрсдийн суугаа хотынхоо гол тулгамдсан асуудлыг хөндөн ярьж, санаа бодлоо солилцлоо. Хотуудад нүүрэлсэн хөрс, ус, агаарын бохирдол, хүн ам, хогны бөөгнөрөл, машин тэрэгний түгжрэл, дэд бүтцийн хэт их ачаалал хaa сайгүй байна. Дели гэхэд дэлхийн хамгийн бохирдсон хотын тоонд оржээ. Сүүлийн жилүүдэд байгалийн гамшиг, ажилгүйдэл, ядуурлаас шалтгаалан иргэд хот суурин газар руу шилжих нь ихсэж, улмаар зориулалтын бус эрүүл ахуйн шаардлага хангахгүй орчинд амьдрахад хүрч байгаагийн зарим жишээ нь энэ юм.

Харин Фүүкүокагийн асуудал өөр. Тэнд хуучны барилгуудыг шинэчлэх нь гол асуудал гэнэ. Эхнээсээ хүн төвтэйгээр зөв төлөвлөгдсөн хот гэж энэ байх. Японы аль ч хот, мужид явсан тэнгэр баганадсан өндөр шилэн барилгууд нүд гялбуулна. Давхар замууд нь ч түүнээс намдахгүй. Хүн амын нягтшил, хот төлөвлөлт, давхар замын шийдэл, зайд талбай

ашиглалт гээд суралцах зүйл олон.

Бага хурлын өдрүүдэд туршлага болгох үүднээс Фүүкүокагийн захын Цяязакид очиж, төрөлх хот тосгоноо сэргээн хөгжүүлэхийн төлөө хамтдаа зүтгэж яваа жирийн Япон хүмүүстэй уулзаж ярилцав. Энд настан голдуу хүмүүс байдаг. Залуус нь ажил, сургуул, бизнесээ бараадан хот газрыг зорьжээ. Эндээ суурьшсан цөөн нэгэн ч бий. Сатору Яамагучи гэдэг залуу гэр бүлийнхээ хамт бизнес эрхэлж байна. Тэр эзэнгүй хоосон байшинг гэр буудлын зориулалтаар түрээслүүлдэг гэнэ. Эзэнгүй гэдэг нь тэнгэрт хальсан нэгний зах хязгаар газарт байдаг зарагдах боломжгүй байшинг хэлж байгаа аж. Түүнээсээ олсон орлогоо гэр бүлдээ, тосгоныхондоо зориулдаг байна. Тийм байшингуудад бас олон нийтийн ажлууд зохиогддог. Олны төлөө Цяязакийнхан үнэт цагаа зориулж, нэгдмэл нэгэн бүлийг өөрсдөө бий болгож чадаж байна. Орон нутгийн удирдлагын зүгээс ч иргэдийнхээ санаачлагыг дэмжсээр иржээ. Хотын удирдлага, иргэдийн сайн дурын байгууллага, олон нийт гэсэн гинжин холбоо тэнд байна.

Цяязакийнхан зочдоо халуунаар уgtаж, гарын хоолоороо дайлав. Япон улсын дэлхийд гайхагддаг нэг чанар бол хоол. Амтат суши, халуун тогооны тахианы мах, жантай гоймон, сашими гээд энэ жагсаалт үргэлжилнэ. Ер нь Их наран улсад зочилсон зочид гийчдийн хувьд япончуудын өөрсдийнх нь найрсаг, уриалгахан зан чанар сэтгэлд тод үлддэг гэх. Яг тийм мэдрэмжийг Цяязакийн нөхөд бидэнд төрүүлсэн юм. Япон улсад олон жилийн туршид хөдөө орон нутгаас хот суурин газар руу чиглэсэн хүн амын шилжих хөдөлгөөн үргэлжилсээр байна. Ийм байдал ерөнхийдөө хaa сайгүй байсаар байгаа. Дэлхийн нийт хүн амын 50 хувь өнөөдөр хотод суурьшиж, бус нутгийн тэнцвэрт бус байдал бий болов. Ийм учраас хүн амын тогтвортой хөгжил бүхий нутагшилт, суурьшлийн бодлого шинээр гарч ирсэн. НҮБ-ын Хүн амын нутагшил, суурьшлийн хөтөлбөрийнхэн энэ талаар улс орнуудтай хамтран ажиллаж байна. Монгол Улсын хувьд шилжих хөдөлгөөний улмаас нэгэнт бий болсон сөрөг үр дагавар, эрсдэлт байдлыг бууруулах, халамжийн орон сууцуудыг бий болгох, хөрш орнуудыг холбосон гол төмөр зам, хурдны зам зэрэг дэд бүтцийн томоохон бүтээн байгуулалттай холбогдон шинэ хот суурин газруудыг төлөвлөх зэрэг цогц асуудлууд бий.



Газар нутгийн хэмжээгээр төдий л гайхуулах юмгүй арлын Япон орон бусдад санаа болох туршлага арвintай. 1947 онд батлагдсан тус улсын Үндсэн хууль ард түмний тусгаар тогтнол, хүний эрх болон энх тайвныг хамгаалах гэсэн гурван зарчим дээр тулгуурладаг. Зөвхөн хүн амын нутагшил, суурьшлийн хүрээнд гэхэд Япон улс бага орлоготой өрхөд зориулсан орон сууцны хөтөлбөрийг хэрэгжүүлэхдээ өрх толгойлсон эмэгтэйчүүдэд чиглүүлэн хэрэгжүүлж иржээ.

Бид Фүүкүокагийн орон сууцны хотхонд байдаг Хошинохара кафед очсон юм. Авсаархан, тохилог, бүтээгдэхүүн нь амттай энэ кафег үйлчлэгч бүсгүйчүүл ажиллуулж байна. Тэднийг хотхоныхоо 250 оршин суугчийн төлөөх сайн үйлсийн санаачлагч, манлайлагчид гэж хэлж болно.

Кафены эрхлэгч Митсүко Мотокатай ярилцахад "Манай кафе бол оршин суугчдын уулзах цэг. Олон нийтийн үйл ажиллагаа хамтраад явуулах газар. Хүүхдээс хөгшид хүртэл 70 гаруй оршин суугч кафены маань ажилд их бага хэмжээгээр оролцон тусалж, хамтран ажиллаж байгаа.

Бид бие биенээ таньж мэдэх, хэзээ ч ганцаардахгүй байх, улмаар халуун дотно яриа кафедаа өрнүүлэх гээд зорилгуудтай. Хүмүүст өгөөжөө өгч байгаа гэж ойлгож болно шүү. Ийм сайхан үйлсийн санаачлагыг анх их сургуулийн доктор, багш хүн санаачилсан юм.

Оюутнууд нь бидэнтэй хамтран ажилладаг. Бид ажилдаа дуртай. Үргэлж нэг нэгнийхээ төлөө явдаг. Кафенаасаа олсон ашгаа эргээд оршин суугчиддаа зориулдаг. Сэтгэл тэнүүн явах шиг жаргал байх уу" гэж хэлж байлаа. Хошинохарагийнхан өөрөө өөрсдийнхөө төлөө бүтээн байгуулж, нэгдэн ажиллаж чадаж байна. Кафеныхаа нэрийг ч тэд өөрсдөө өгсөн гэнэ.

Энгийн бүхэн их юм илтгэдэгийн жишээ энэ байх. Фүүкүока, фүүкүокагийнхан богино хугацаанд ийм сэтгэгдэл үлдээв.

Энэ нийтлэлийн эх сурвалж MorningNews.mn



Мэдээний URL:

<http://www.morningnews.mn/modules.php?name=News&file=article&sid=26678>